



ЖАҢАРҒАН ДЕПОНЫҢ ЖҰМЫСЫ ОҢДЫ

8-БЕТ | ШАҢАР ШАРУАШЫЛЫҒЫ



ЖАРТЫ ҒАСЫР ОҚЫРМАН ОРТАСЫНДА

11-БЕТ | РУХАНИЯТ



ҰЛЫ МЕРЕКЕНІ ҰЛЫҚТАҒАН

12-БЕТ | СПОРТ



Қасым-Жомарт ТОҚАЕВ,
ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

ЭКОНОМИКА ӨСКЕН САЙЫН ӘЛЕУМЕТТІК ТЕҢСІЗДІК АЗАЙЫП, ОРТА ТАП КҮШЕЙЕ ТҮСУІ КЕРЕК. СОНДА ҒАНА БІЗ ЕЛІМІЗДІҢ ӘЛЕУЕТІН КҮШЕЙТЕ АЛАМЫЗ. ОЛ ҮШІН КЕЗ КЕЛГЕН ІСТІҢ БАСТЫ ӨЛШЕМІ ТИІМДІЛІК БОЛУҒА ТИІС. ЯҒНИ ӘРБІР ШЕШІМ, ӘРБІР ЖОБА ЕҢ АЛДЫМЕН ЕЛГЕ ПАЙДАЛЫ БОЛУЫ ҚАЖЕТ.

№129
(4717)

Сейсенбі
29 қазан
2024 жыл



ASTANA



РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

A Q S H A M Y

1990 ЖЫЛҒЫ 13 ҚАЗАННАН БАСТАП ШЫҒАДЫ



LRT ҚҰРЫЛЫСЫ ҚАРҚЫН АЛДЫ

Астанада қарқын алған LRT құрылысы 2025 жылдың соңында аяқталады деп жоспарланып отыр. Жалпы ұзындығы 22,4 шақырым болатын жеңіл рельсті көлік желісінде 18 станса, 19 жылжымалы вагон құрамы жүреді. Ауқымды жобаның құрылыс барысын Үкімет басшысы Олжас Бектенов пен елорда әкімі Жеңіс Қасымбек тексерді.

ҚАЙЫРЫМДЫЛЫҚ КӨМЕК

Республика күніне орай бас қалада әлеуметтік жағынан аз қамтылған отбасыларға азық-түлік себеті таратылды.

Астана қаласы әкімдігі мен «Астана жастары» еріктілері Qazaq oil компаниясымен бірлесіп ұйымдастырған игі іс-шарада әлеуметтік жағынан аз қамтылған, көпбалалы отбасыларға, сондай-ақ ерекше балаларды тәрбиелеп отырғандарға 1 мың себет азық-түлік үлестірілді. Іс-шараға 100-ге жуық волонтер қатысты. Астанада Республика күніне арналған бұл қайырымдылық акциясы 3 жылдан бері өтіп келеді. Биыл акция барысында жалпы салмағы 45 тоннадан артық азық-түлік себеті таратылды.

БАУЫ БЕРІК БОЛСЫН!

Республика күні қарсаңында елордада екі рет үшем дүниеге келді. Бұл қуанышты қалалық Қоғамдық денсаулық сақтау басқармасының баспасөз қызметі хабарлады.

№2 қалалық көпбейінді ауруханада босанған Айша Исхакова бұған дейін екі баланың анасы еді. Енді үшемді дүниеге әкеліп, бақытты ана атанды. Жаңа туған сәбилерге Томирис, Ибрахим және Мухаммад есімдері беріліпті. Астаналық тағы бір ана Сәбина Алтынбекқызы да үш батырды дүниеге әкелді. Үшемнің атасы немерелерін Қабанбай, Бөгенбай, Наурызбай деп атапты. Үшемдердің бәрі аман-есен перзентханадан үйіне шығарылды.

ӨҢІРЛІК ЖӘРМЕҢКЕЛЕР ӨТТІ

Астанада өтетін өңірлер жәрмеңкесі қала тұрғындары үшін әрі қолайлы, әрі тиімді болып тұр. Азық-түлікті өндірушінің қолынан тікелей алатын болғандықтан, мұндағы өнім бағалары дүкендерге қарағанда әлдеқайда арзан болады.



ҮШ ДҮРКІН ӘЛЕМ ЧЕМПИОНЫ!

Еркін күрестен Қазақстан құрамасының өкілі Ризабек Айтмұхан Албанияда өткен 23 жасқа дейінгі жастар арасындағы әлем чемпионатында 97 келіге дейінгі салмақта жеңімпаз атанды. Бұл – Ризабек Айтмұханның әлем чемпионатындағы үшінші жеңісі.

Астаналық балуан шешуші белдесуде ирандық Махди Морафаны 11:6 есебімен тізе бүктірді. Бұл – Ризабектің екі жыл ішінде үшінші рет алған жүлдесі. Өткен жылы Айтмұхан 92 келіге дейінгі салмақта ересектер арасында әлем чемпионы атанған, бұл Қазақстан тарихындағы еркін күрес балуандары арасындағы алғашқы алтын болды. Ал биыл Айтмұхан 20 жасқа дейінгі жастар арасындағы әлем чемпионатында да топ жарған еді.

ВАЛЮТА
БАҒАМДАРЫ

€ EUR/KZT 523.82 \$ USD/KZT 485.11 ₰ RUB/KZT 5.04 ¥ CNY/KZT 68.18

t.me/elordainfo

www.astana-akshamy.kz



LRT ҚҰРЫЛЫСЫ ҚАРҚЫН АЛДЫ

Қазақстан Премьер-министрі Олжас Бектенов елордада жеңіл рельсті көлік (LRT) желісін салу жөніндегі жобаның барысын тексерді. Астана қаласының әкімі Жеңіс Қасымбек нысанның дайындық деңгейі және мегаполистің көлік жүйесін одан әрі дамыту келешегі туралы баяндады.

Бүгінгі таңда LRT эстакадасының арқалықтарын төсеу кезеңі аяқталды. Стансалардың негізгі темірбетон конструкциялары құрылысын 2024 жылдың соңына дейін аяқтау жоспарланып отыр. Келесі жылы рельстерді төсеу, стансаларды әрлеу және жылжымалы құрамдарды жеткізетін депо құрылысын жүргізу, Қабанбай батыр даңғылы мен Ш.Қалдаяқов көшесі бойындағы эстакадалық бөлікті абаттандыру жүргізіледі.

Жеңіл рельсті желінің жалпы ұзындығы 22,4 км құрайды. LRT құрамына 18 станса кіреді. 652 адам сыятын 19 жылжымалы құрамды іске қосу жоспарлануда. Қозғалыс аралығы 4-5 минутта құрайды. Бастапқы кезеңде тәулігіне 25 мың жолаушы ағыны күтіледі, бұл ретте жолаушылар ағыны ең жоғары уақытта тәулігіне 92 мың адамға жетуі мүмкін. Төлем жүйесі қалалық аналогы бойынша көлік картасын валидациялау немесе QR-кодпен төлеу қарастырылған.

Станса аумағында Премьер-министр құрылыс барысында қолданылатын технологиялық шешімдермен танысты. Жобаны іске асыруға China Construction Sixth Bureau, Yunnan Construction and Investment Holding Group Co., Longjian Road and Bridge Co., Tianjin Rail Transit Group Co., CRRC Tangshan Co LTD, CASCOS, HUAWEI Smart Transport BU компаниялары көлік жүйесінің қауіпсіз әрі тиімді жұмысын қамтамасыз етуде шешуші рөл атқаратын байланыс, дабыл және автоматтандыру жүйелерін реттеуге қатысады.

China Railway Asia-Europe Construction Investment қосалқы мердігер компаниясының бас директоры Чжоу Хайвэй инновациялық технологиялар қолданылып жатқанын баяндады. Жоба аяқталғаннан кейін жеңіл рельсті желі бойымен жү-

гізушісіз пойыздар іске қосылады. «City Transportation Systems» ЖШС басқарма төрағасы Асылбек Дүйсебаевтың айтуынша, барлық құрылыс жұмысын аяқтап, LRT-ны іске қосу 2025 жылдың соңына жоспарланған.

Олжас Бектенов жобаның сапасы мен іске асырылу мерзімін бақылауды күшейту қажеттігін атап өтті.

«Мемлекет басшысы еліміздің көлік жүйесін дамытуға үлкен көңіл бөлуде. LRT жобасы бойынша инфрақұрылымды дайындау жөнінде қыруар жұмыс жүргізілді, қаражат бөлінді. LRT елорда тұрғындары мен қонақтарына қызмет көрсетеді. Құрылыс жұмысының қарқыны артып келеді, оны бәсеңдетпеу маңызды. Жоба ең жоғары деңгейде жүзеге асырылуы керек. Әкімдік пен орталық мемлекеттік органдар тарапынан бақылау күшейтілуі тиіс. Нәтижеге жұмыс істейтін боламыз» деді Премьер-министр.

ТАУАР ӨНДІРУШІЛЕРДІ ТИІМДІ ҚОЛДАУ

Премьер-министр Олжас Бектенов Мемлекет басшысының отандық кәсіпкерлік субъектілерін мемлекеттік қолдау шараларының ашықтығы мен тиімділігін арттыруға қатысты тапсырмаларын орындау мәселесі бойынша жұмыс кеңесін өткізді.

Негізгі міндет – мемлекеттік сатып алулар мен мемлекеттік қолдау шараларына басым қолжетімділігі бар кәсіпкерлік субъектілерін санаттарға бөлу әдіснамасын цифрландыру. Бұл ретте мемлекеттік қолдау алатын кәсіпкерлік субъектілерінің өзара міндеттемелері қажет. Өнім сапасы, еліміздегі өндірісті локализациялауға және қазақстандық қамту үлесі, сондай-ақ кәсіпорынның өңір мен еліміздің әлеуметтік-экономикалық дамуына одан әрі қосқан үлесіне баса назар аударылу. Цифрлық формат сыбайлас жемқорлық тәуекелдерін және адами фактордың әсерін жоюға мүмкіндік береді.

Бүгінгі таңда Үкімет мемлекеттік қолдау шараларының өнеркәсіп саласын дамытудағы әсеріне кеңейтілген талдау жүргізуде. Жаңа ақпараттық платформа кәсіпкерлік белсенділік бойынша деректерді мемлекеттік қолдау шараларын алғанға дейін және кейін динамикада көрсетеді.

Платформада отандық кәсіпорындар, олардың жүктемесі, шығарылатын өнімдер, сыртқы сауда қызметі, қызметкерлер саны, сондай-ақ олармен жасалған шарттар, оның ішінде ұзақ мерзімді және офтейк-келісім-шарттар туралы деректер бар. Жүйе мемлекеттік органдарға проактивті форматта талдау, мониторинг жүргізуге және бизнеске уақытылы қолдау көрсету үшін басқарушылық шешімдер қабылдауға мүмкіндік береді.

Өнеркәсіп және құрылыс министрі Қанат Шарлапаев 2 мыңнан астам отандық кәсіпорынның деректер жүйесіне жүктелгені туралы баяндады, отандық өнімді әлеуетті сатып алушылар саналатын реттелетін сатып алу субъектілері – компаниялар туралы мәліметтер бар, сондай-ақ жер қойнауын пайдаланушылар мен бизнес арасында жасалған ұзақмерзімді шарттар туралы ақпарат жүктелген.

Smart Data Ukimet ақпараттық-талдау жүйесі негізінде

әзірленген платформа бұрын шашыраңқы ақпараттық жүйелерден алынған деректерді біріктіреді және жүйелейді. Ол Қаржы, Еңбек және әлеуметтік қорғау министрліктерінің, СК-Фармация, «Самұрық-Қазына келісімшарт» ЖШС, электрондық сатып алулар, квазимемлекеттік сектордың (Mitwork) және жер қойнауын пайдаланушылардың (NadLock) реттелетін сатып алуларының базаларымен толық интеграцияланған. Сонымен қатар «Даму» кәсіпкерлікті дамыту қоры мен «Бәйтерек» холдингінің қазақстандық кәсіпорындарға көрсетілетін қолдау шаралары туралы деректері жүктелді. Ақпаратты жаңарту онлайн режимінде жүзеге асырылады.

Цифрлық даму, инновациялар және аэроғарыш өнеркәсібі, Денсаулық сақтау, Қаржы министрліктерінің басшылары да платформаны толтыру және практикалық қолдану бойынша атқарылған жұмыстар туралы баяндады.

ЖАН-ЖАҚТЫ ЗЕРДЕЛЕУ ТАПСЫРЫЛДЫ

Сенат спикері Мәулен Әшімбаевтың төрағалығымен Палата бюросының отырысы өтті. Онда депутаттар 31 қазан күні өтетін Сенат отырысының күн тәртібін бекітті және Мемлекет басшысының тапсырмаларын іске асыру аясындағы міндеттерді талқылады.

Соған сәйкес, алдағы бейсенбіде сенаторлар екі мәселені қарайды. Олардың бірі – «Қазақстан Республикасы мен Вьетнам Социалистік Республикасы арасындағы сотталған адамдарды беру туралы шартты ратифика-

циялау туралы» заң. Аталған құжаттың нормалары екі мемлекет арасындағы құқықтық ынтымақтастықты нығайтуға және сотталғандардың жазасын өтеу үшін олар азаматты болып табылатын мемлекетте қоғамға қайта қосылуына жәрдемдесуге арналған.

Сондай-ақ Палата отырысында Қазақстан Республикасы Цифрлық даму, инновациялар және аэроғарыш өнеркәсібі министрінің бір топ сенатор-

тапсырмаларын іске асыру аясында аграрлық секторды тікелей субсидиялаудан қолжетімді несиелендіруге көшу және денсаулық сақтау жүйесін кадрлық тұрғыдан қамтамасыз ету мәселелерін жергілікті тұрғындармен



Бюро отырысында депутаттардың алдағы уақытта Абай облысының Курчатов қаласында өтетін радиациялық және сейсмикалық қауіпсіздік мамандарымен кездесуіне қатысты мәселелер де талқыланды. Қазақстанда АЭС салынуына байланысты бұл тақырыптың өзектілігі арта түскені анық.

Сонымен қатар сенаторлар Мемлекет басшысы Қасым-Жомарт Тоқаевтың

бірге талқылау үшін өңірлерге барып, кездесулер өткізеді.

Мәулен Әшімбаев атап өткендей, қазір елімізде, әсіресе ауылдық жерлерде білікті медицина кадрларының тапшылығы өте өзекті. Сондықтан саладағы проблемаларды жан-жақты зерделеу, тиісті мамандармен бірлесіп оларды шешу жөнінде ұсыныстар әзірлеудің маңызы зор.

ҮШЖЫЛДЫҚ БЮДЖЕТ ЖОБАСЫН ҚАРАЙДЫ

Мәжіліс спикері Ерлан Қошановтың төрағалығымен бюро отырысы өтіп, онда алдағы жалпы отырыстың күн тәртібі нақтыланды. 2025-2027 жылдарға арналған республикалық бюджет туралы және осы жылдарға Ұлттық қордан кепілдендірілген трансферт туралы заң жобалары депутаттардың қарауына ұсынылады.

Түзетулер еліміздің әлеуметтік-экономикалық даму болжамын, 2025-2027 жылдарға арналған бюджет параметрлерін және Президент тапсырмаларын негізге ала отырып, Бюджет кодексіне сәйкес әзірлен-

ді. Сондай-ақ депутаттар «Қазақстан Республикасының аумақтық қорғанысы туралы» заң жобасын ілестіретін түзетулерімен бірінші оқылымда талқылайды. Үкімет әзірлеген заң жобасы республиканың аумақтық

қорғанысының құқықтық негіздерін, мақсаттары мен қағидаттарын айқындап, мемлекеттік органдардың, ұйымдар мен азаматтардың аумақтық қорғаныс саласындағы өкілеті мен міндетін белгілейді.



№129 (4717) 29/10/2024 Сейсенбі

ҮЗДІК ПЕДАГОГТАР МАРАПАТТАЛДЫ

Республика күні қарсаңында елордалық педагогтар «Үздік педагог-2024» республикалық байқауының жеңімпаздары атанды.

**Индира
БЕРЖАНОВА**

Салтанатты жиында Оқу-ағарту министрі Ғани Бейсембаев республика бойынша мектепке дейінгі, орта, техникалық және кәсіптік білім беру ұйымдарының 64 педагогіне марапат табыстады. Жеңімпаздар қатарындағы 5 педагог – астаналық ұстаздар. Олар:

- Жамбыл Жабаев атындағы №4 мектеп-гимназияның химия пәні мұғалімі Ақмарал Қожантаева;
 - Сұлтанбек Қожанов атындағы №64 мектеп-лицейдің география пәні мұғалімі Баян Қырғызбаева;
 - №73 мектеп-лицейдің тарих пәні мұғалімі Гүлназия Ұзақбайқызы;
 - №46 балабақша-мектеп-гимназияның география пәні мұғалімі Андрей Хлыбов;
 - Жоғары кәсіптік және коммуникация колледжінің арнайы пәндер оқытушысы Айнагүл Сүндетова.
- Жеңімпаздарға «Үздік педагог»



күзегі мен төсбелгісі, 1000 айлық есептік көрсеткіш көлеміндегі ақшалай сыйақы берілді.

Адал әрі табанды еңбек етіп, ба-

лаға үйретуден жалықпайтын ұстаздар қауымы түрлі ізденістері мен тың жобалары арқылы бүгінде білім берудің сапасын арттырып келеді.

ДОМБЫРАШЫ-КҮЙШІЛЕР ДОДАСЫ

«Күй анасы» республикалық қорының бастамасымен, Астана қаласы әкімдігінің қолдауымен Дина Нұрпейісова атындағы «Астана – күй қанатында» домбырашы-күйшілердің II қалалық байқауы өтті.



Жастардың ұлттық мәдениетке деген сүйіспеншілігін арттыру мақсатында өткен байқауда 40 қатысушы бақ сынады.

Жалпы күй байқауы екі кезең бойынша өтті. Атап айтқанда, бірінші кезең онлайн форматта өтіп, нәтижесінде екінші кезеңге өткен 24 қатысушы анықталды. Олар Құрманғазы мен Дина Нұрпейісованың бір-бір күйін орындады.

Байқау қорытындысы бойынша 14-18 жас аралығындағы қатысушылар арасында 1-орынға Ералы Таутих ие болды, 2-орын Жазира Ораковаға, ал 3-орын Қорғасбек Изатуллаға бұйырды. 19-35 жас аралығындағы қатысушылар арасында 1-орынды Валерия Булекбай алды, 2-орынға Дильнара Анарбекова, ал 3-орынға Ғалымжан Ғаббас ие болды.

Зарина СӘРСЕНБАЙҚЫЗЫ

ДІН ТАҚЫРЫБЫН ТҮСІНДІРДІ

Қазақстан Республикасы Мәдениет және ақпарат министрлігі Дін істері комитетінің қолдауымен республикалық ақпараттық-түсіндіру тобы мүшелері Астана қаласына іссапармен келді.

Аталған іссапардың мақсаты – жастардың экстремизмге қарсы санасын қалыптастыру, діни экстремизм мен терроризмге қарсы іс-қимыл мәселелерінде құқықтық және азаматтық жауапкершілік деңгейін арттыру, Қазақстан жастарын радикалды және деструктивті діни топтарға айналдыруға жол бермеу.

Қалада жалпы саны 20 іс-шара ұйымдастырылды. Аталған іс-шараға Астана қаласы әкімдігі Діндерді зерттеу орталығының теологы Арман Нұрахметұлы, «Нұр Мұбарак» Египет ислам мәдениеті университетінің аға оқытушысы, PhD доктор Түсіпхан Имамұмади, «Нұр Мұбарак» Египет ислам мәдениеті университетінің оқытушысы, магистр Данияр Еркінұлы, Астана қаласы әкімдігі Діндерді зерттеу орталығының бөлім басшысы Нұрсұлтан Берікұлы қатысып, дәріс оқыды.

Түсіндіру тобының мүшелері Астана қаласы аумағында ЖОО

мен колледж студенттері базасында болды. Олар жастар арасында «Қазақстан Республикасы – зайырлы

мемлекет», «Жастар және дін», т. б. тақырыптарда түсіндіру жұмысын жүргізді.



Елордада мемлекеттік сатып алу саласында 127 кәсіпкердің құқығы қорғалды. Бұл туралы Астана қаласы коммуникациялар қызметінде өткен брифингте қалалық прокуратура басқармасының прокуроры Тархан Закарин айтты.

КӘСІПКЕРЛЕРДІҢ ҚҰҚЫҒЫ ҚОРҒАЛДЫ

Кәсіпкерлік субъектілерінің құқығын қорғау бағытында прокуратура органдары бірқатар жұмыстар атқарды.

«Биыл мобильді топтарға 90 сигнал келіп түсті, қарау нәтижелері бойынша оның 32-сі расталды, сондай-ақ кәсіпкерлердің құқығын қорғау аясында басқа да жұмыстар бойынша 33 заң бұзушылықты жою туралы ұсыныс, 13 наразылық енгізілді, шектеу шараларын алып тастау туралы 5 қаулы шығарылды. Нәтижесінде 47 лауазымды тұлға

тәртіптік, 95 тұлға әкімшілік жауапқа тартылды, 4000-нан астам кәсіпкердің құқығы қорғалды, кәсіпкерлер 16 млн теңге айыппұл сома-сынан босатылды» деді прокурор.

Оның айтуынша, кәсіпкерлер құқығының көп бұзылуы салық, мемлекеттік сатып алу және жер қатынастарында болып тұр. Дегенмен прокуратура органдары бұзушылықтарды жою, оларды болдырмау мақсатында ықпал етіп, бизнес субъектілерінің құқығын қорғау жөніндегі жұмыстарды қарқынды жүргізуде.

ҚАЛАМҒЕР ҚОЛТАҢБАСЫНЫҢ САЛТАНАТЫ

Кеше елордада көрнекті жазушы-драматург, Абай атындағы Мемлекеттік сыйлықтың лауреаты, Қазақстанның еңбек сіңірген қайраткері Роза Мұқанованың драматургиясына арналған «Театр all» III халықаралық театр фестивалінің ашылу салтанаты өтті. Астана қаласы әкімдігінің қолдауымен 3 қарашаға дейін жалғасатын өнер мерекесіне ел театрларымен қатар Әзербайжан мен Қырғызстан ұжымдары қатысып жатыр.



**Аманғали
ҚАЛЖАНОВ**

Фестиваль М.Әуезов атындағы Қазақ ұлттық драма театрының «Мәңгілік бала бейне» қасиетнамасымен ашылды. Дәл осы қойылымды елордаға А.Тоқпанов атындағы Жамбыл облыстық қазақ драма театры да (режиссері – А.Оспанбаева) әкеліп отыр. Сондай-ақ Роза Мұқанованың драматургиядағы жолын ашқан аталмыш спектакльді Астана қаласы әкімдігінің Қуыршақ театры (режиссері – Қ.Ешмұратова) және Астана қаласы әкімдігінің Музыкалық жас көрермен театры «Қызжылаған» атауымен (режиссері – Абзалбек Максим) ұсынады.

Фестиваль қарсаңында «Қызжылағанның» премьерасы өтті. Жалпы қаламгердің «Мәңгілік бала бейне» әңгімесінің сахнаға жол тартқанына биыл 28 жыл болды. Содан бері талай театрда сахналанды. Әңгіменің пьесаға айналуына бірден-бір себепкер – тағдырлы талант Болат Атабаев. Қара шаңырақ – Мұхтар Әуезов театрында алғаш сахналанған да өзі. Яғни Болат Атабаев – «Мәңгілік бала бейненің» тұңғыш қоюшы режиссері. Ал әзірге соңғысы – Абзалбек Максим. Мұның алдында жас режиссер дәл осы спектакльді Астананың «Жастар» театры жанындағы «Қанаттылар» инклюзивті театрында сахналаған. Қойылымның бұл нұсқасы бас кейіпкер Ләйләні шынайы, беріле сомдаған марқұм Малика Мұхтарованың ойынымен есте қалды. Соны қоюшы режиссер Музыкалық жас көрермен театрында жаңаша жаңғыртты. Мұн-

да полигон тақырыбы, оның зардаптары ғана емес, жастар тәрбиесі, ауылдардың қаңырап қалуы, сайлау алдында неше түрлі уәде беріп, соңында орындамайтын депутаттар мәселелері қамтылған. Абзалбектің спектакльді беруді шығарма авторы Роза Мұқановаға да, Болат Атабаев нұсқасын көріп, кезінде үлкен мақала жазған көрнекті жазушы, халықаралық «Алаш» әдеби сыйлығының лауреаты, Қазақстанның еңбек сіңірген қайраткері Шәрбану Бейсеноваға да ұнады.

«Театр all» III халықаралық театр фестивалі бағдарламасында Бішкек қаласы Жамал Сейдакматова атындағы «Тунгуч» жастар театрының «Жесір» драмасы (режиссері – А.Қыдырмышев), С.Сейфуллин атындағы Қарағанды облыстық қазақ драма театрының «Ешкім де кінәлі емес» драма-абсурды (режиссері – Б.Киекбаев), Х.Бөкеева атындағы Батыс Қазақстан облыстық қазақ драма театрының Роза Мұқанова инсценировкасын жасаған Мұхтар Әуезовтің «Қаралы сұлу» метафизикасы (режиссері – А.Шәріпов), Қ.Қуанышбаев атындағы Қазақ ұлттық музыкалық драма театрының «Бопай ханым» спектаклі (режиссері – Ж.Жұманбай), Түркістан музыкалық драма театрының «Фариза» драмасы (режиссері – Ф.Молдағали), Әзербайжан Республикасы, Газах мемлекеттік драма театрының «Шатыр астындағы мен» трагикомедиясы (режиссері – М.Әйюбов) бар. Сондай-ақ фестиваль аясында Р.Мұқанованың 60 жас мерейтойына арналған «Жарық дүние» атты шығармашылық кеш өтеді.

№129 (4717) 29/10/2024 Сейсенбі

Астанада қыркүйек айынан басталған ауыл шаруашылығы тауарларын өндірушілердің өңірлік жәрмеңкесі мәресіне жетті. Оны Ақмола, Қостанай және Ұлытау облыстарының тауар өндірушілері аяқтады.

Гүлбаршын
ӨКЕШҚЫЗЫ

Биылғы жәрмеңке Қарқаралы тасжолындағы «Қазанат» ипподромына қарама-қарсы орында өтті. Оның соңғысына қатысқан үш облыс фермерлері елордаға 800 тоннаға жуық өнім әкелді.

Ақмола облысы Ауыл шаруашылығы басқармасының басшысы Кенеш Әлімжановтың айтуынша, аталған облыс – Астананың азық-түлік белдеуі.

– Ақмола облысы Астананың айналасында азық-түлік белдеуін құрудың негізгі буыны және жалпы республикалық астық өндірісінің төрттен бірінен астамын өндіреді. Осындай игі іс-шара аясында біз елордамен тұрақты түрде жұмыс істеп келеміз. Елорда тұрғындары үшін өнімдеріміз қашанда сұранысқа ие, – деді басқарма басшысы.

Бұл жолы Ақмола облысы 300 тоннадан астам жаңа өнімдерді, оның ішінде ет, сүт, көкөніс және жарма өнімдерін ұсынды. Жәрмеңкеге қатысушылардың арасында «Гормолзавод», «Родина», «Макинск құс фабрикасы», «Бижан», «Қазгер құс» сияқты ірі жергілікті өндірушілер бар. Бурабай ауданының «Жас» ЖШС жетекшісі Зәуре Ғалиақпарова жәрмеңкеге жыл сайын келетінін, дәстүр бойынша биыл да ет және еттен жасалған түрлі өнімді алып келгенін жеткізді.

Қостанай облысының аграршылары 402 тонна өнім, оның ішінде 52 тонна ет, 95 тонна көкөніс және 40 тонна ұн, сонымен қатар брендтері республикаға және одан тыс жерлерге танымал «Милх», «ДЕП», «Бан сұлу», «Бекиров» және т. б. кәсіпорындар өздері өндірген сүт және кондитерлік өнімдер әкелді. Ұлытау өңірі жәрмеңкеге 70 тонна ет, көкөніс және сүт өнімдерін жеткізді.

Жалпы биылғы іс-шара қыркүйектің 21-інде басталып, жәрмеңке маусымын алғашқы болып Ақтөбе, Атырау және Жамбыл облыстарының аграршылары ашқан болатын. Олар елордаға 400 тонна өнім жеткізді. Ақтөбе облысында өндірілген өнімдердің арасында ет және сүт, көкөніс түрлері мол болса, Жамбыл облысының ауыл шаруашылығы тауарларын өндіруші 10 аудан мен Тараз қаласының 90-нан астам ауыл шаруашылығы тауарларын өндірушілер 10 автокөлікке тиелген азық-түлік жеткізді. Оның ішінде 33,2 тонна ет (жылқы, сиыр, қой және тауық еті), 4 тонна шұжық өнімдері, 22,2 тонна сүт өнімдері, 6 мың жұмыртқа, 10 тонна қант, 2,5 литр өсімдік майы, 1 тонна ас тұзы, 4 тонна балық, 4 тонна ұн, 6,8 тонна бал және 202,3 тонна жеміс-жидек пен көкөніс өнімдері болды. Ал Атырау облысынан алғашқы жәрмеңкеге барлығы 27 шаруашылық иелері қатысты.

28-29 қыркүйекте астаналықтарға Абай және Қызылорда облыстарының шаруала-



КҮЗГІ ЖӘРМЕҢКЕ КӨҢІЛДЕН ШЫҚТЫ



Биыл елордада ұйымдастырылған күзгі жәрмеңкеге 14 өңірден 70-ке жуық фермер келіп, олар 5 мың тоннадан астам өнім сатты. Әр облыс елордаға өздері өсіретін немесе өндіретін өнімдерін әкелді. Тауарлардың бағасы нарықтағыдан 10-20 пайызға төмен

ры 830 тоннадан астам өнім әкелді. Бұл жолы жұрттың көбі Қызылорданың күрішін сатып алуға арнайы барса, Абай облысының атынан Астанаға экологиялық таза бал сататын 6 шаруа қожалығы келді. Олардың өнімдері тек Қазақстан бойынша ғана емес, шетелге де жеткізіліп жүргені шындық. Жергілікті фермерлердің айтуынша, бұл жердің балы – ең таза әрі экологиялық пайдалы өнім. Жалпы Абай және Қызылорда облыстарының ауыл шаруашылығы тауарын өндірушілер жәрмеңкеге 400 тонна күріш, 100 тонна балық, 100 тонна сиыр және жылқы еті, сондай-ақ 30-40 тоннаға жуық бал әкелді.

12-13 қазан күндері Павлодар, Батыс Қазақстан және Жетісу облыстарының аграршылары елордалықтарға өз өнімдерін ұсынды. Ауыл шаруашылығы тауарын өндірушілер елордалық жәрмеңкеге 900 тоннадан астам өнім әкелді. Олардың арасында ет, сүт, шұжық, көкөністер, жеміс-жидектер, сүт өнімдері, өсімдік және жануар майлары, бал, балық, қант, ұн, жарма, түрлі кондитерлік өнім көп болды. Жәрмеңкеге Павлодар облысы 550 тоннаға жуық өнім әкелді, оның басым бөлігі – картоп, көкөніс және бақша дақылдары.

Жетісу облысының аграршылары, жаңа піскен жеміс-жидектер, ет және қантты қоса алғанда, 120 тоннадан астам тауар ұсынса, Батыс Қазақстан облысы ет өнімдерінің алуан түрін, сондай-ақ ұн мен макарон өнімдерін әкелді. Алматылық фермерлер елордалықтарға 200 тонна өнім ұсынды, олардың ішінде әйгілі «Апорт» сұрыпты алмалары ерекше сұранысқа ие болды.

19-20 қазанда Шығыс Қазақстан, Солтүстік Қазақстан және Қарағанды облыстарының аграршылары астаналықтарға өз өнімдерін ұсынды. Бұл жолы Қарағанды облысының аграршылары 400 тоннаға жуық өнім әкелді, оның жартысы картоп пен көкөністер болса, Солтүстік Қазақстан облысы 735 тоннадан астам тауар әкелді, оның да үштен бірін картоп пен көкөністер құрады. Сондай-ақ сөрелерде ет, сүт өнімдері, жұмыртқа, ұн және шұжық өнімдерінің небір-небір түрлері самсап тұрды. Шығысқазақстандықтар жәрмеңкеге шамамен 70 тонна бал әкелді. Сонымен бірге олар елордалықтарға 40 тоннаға жуық жаңа ет пен құс етін ұсынды.

Қысқасы, биыл елордада ұйымдастырылған күзгі жәрмеңкеге 14 өңірден 70-ке жуық фермер келіп, олар 5 мың тоннадан астам өнім сатты. Әр облыс елордаға өздері өсіретін немесе өндіретін өнімдерін әкелді. Бұл ретте оңтүстік аймақтар бақша дақылдарымен, ал батыс өңірлері балық және солтүстік облыстар ет өнімдерімен танымал екені белгілі.

Жәрмеңкеге келген тұрғындардың бірін тоқтатып, әңгіме тарттық. Шырайлым Балтабекқызы зейнеткер екен. Ол демалыс күндері өзіне қажетті заттарды арзанда бағаға сатып алу үшін осында келетінін айтты.

– Астанада өңірлік жәрмеңкелер жыл сайын өтіп келеді. Күзгі жәрмеңкелер көңілімізден шықты. Барлық азық-түлік өнімін осы жерден сатып алып жүрміз. Мұндағы баға дүкендегіден әлдеқайда арзан. Сол себепті мен жыл сайын ұйымдастырылып жүрген осындай жәрмеңкелерден



қалмаймын. Маған тауарларды тікелей шаруалардың қолынан алған ұнайды. Әсіресе кешкі мезгілде еттің бағасы арзандайды. Сондай-ақ бұл жерде сатушылармен саудаласуға болады. Осындай іс-шаралар елордада жиірек өтіп тұрса, қарапайым халыққа қолдау болар еді, – деді қала тұрғыны.

Ұйымдастырушылардың мәлімдеуінше, аталған жәрмеңкелер өңірлерден келген ауыл шаруашылығы өндірушілеріне өз өнімдерін делдалсыз, тұтынушыларға тікелей сатуға мүмкіндік береді. Соның нәтижесінде тауарлардың бағасы нарықтағыдан 10-20 пайызға төмен. Сауда-саттықтан басқа, іс-шараға келушілер аймақ әртістерінің қатысуымен өткен концерт бағдарламаларын тамашалады.

Қалиқбар
ҮСЕМХАНҰЛЫ

Жалпы жүлде қоры 1 миллион 900 мың теңгені құрайтын, биыл дәстүрлі түрде үшінші мәрте ұйымдастырылған турнирге Қойшығара Салғараұлы, Төлен Әбдік бастаған иісі қазаққа танымал ақын-жазушылар, ардагер журналистер, Мемлекеттік сыйлықтың иегері, халық артисі Секен Тұрысбеков сынды өнер жұлдыздары, қоғам қайраткерлері қатысты.

Жарыстың ашылу салтанатында сөз сөйлеген Астана қалалық мәслихатының төрағасы Ерлан Каналимов барша отандастарды ұлтымыздың ұлық мерекесі – Республика күнімен құттықтап, бұл күннің еліміз үшін маңызы айрықша екенін дәйекті дәлелмен атап өтті. «Биыл Қазақстан мәслихаттарының 30 жылдығына орай қаламызда көптеген іс-шаралар ұйымдасстырылды. Соның бірі «Elorda Aqparat» медиахолдингі дәстүрлі түрде өткізіп келе жатқан бильярд турнирі, бүгін міне, Республика күнімен тұспа-тұс келіп отыр. Сондықтан да қатысушыларға мәслихаттардың 30 жылдығымен байланыстырып арнайы жүлделер де тағайындадық» деп өз сөзін түйіндеген ол арнайы марапаттарды өз қолымен тапсырды. Жүсіпбек Аймауытов атындағы номинация – Мемлекеттік сыйлық пен Франц Кафка атындағы сыйлықтың лауреаты, Қазақстанның халық жазушысы Төлен Әбдікке берілді; Әлкей Марғұлан атындағы номинация – жазушы Қойшығара Салғараұлына; Сұлтанмахмұт Торайғыров атындағы номинация – Премьер-министр кеңесі басшысының орынбасары, Қазақстанның еңбек сіңірген қайраткері, жазушы-драматург Ермек Аманшаевқа; Қаныш Сәтбаев атындағы номинация Ұлттық ғылым академиясының академигі, Қазақстанның еңбек сіңірген қайраткері Уәлихан Қалижановқа табысталды.

Жарыстың бас төрешісі белгілі спорт журналисі Несіп Жүнісбайұлы болды. Қатысушыларға қомақты жүлдеден бөлек, арнаулы сыйлықтар таратылды. Жереби тарту әдісімен 32 ойыншы топқа бөлініп, бәсекеге түскен бұл жарыста ақын Дәулеткерей Кәпұлы топ жарып, бас бәйгеге тігілген



ҰЛЫ МЕРЕКЕНІ ҰЛЫҚТАҒАН ЖАРЫС

Республика күніне орай және мәслихаттардың 30 жылдығы аясында Астана қалалық мәслихатының қолдауы, «Elorda Aqparat» медиахолдингінің ұйымдастыруымен журналистер мен қаламгерлер арасында бильярд жарысы өтті.

500 мың теңгені қанжығасына байласа, екінші орын ардагер журналист, ақын Тұрмағанбет Ердешұлына бұйырды. Үшінші орынды Л.Гумилев атындағы Еуразия Ұлттық университетінің баспасөз орталығының жетекшісі Ербол Ерденбек пен «Хабар» арнасының қызметкері Ахмет Қайратұлы өзара бөлісті.

Үздік ойын көрсеткен «Мәдениетті ойыншы» номинациясы қоғам қайраткері Дархан Мыңбайға, «Мерген ойыншы», Парламент Мәжілісінің депутаты Жанарбек Әшімжанға, «Шебер ойыншы» номинациясы ардагер журналист Кенже Жұмағұловқа, «Үздік ойыншы» номинациясы Талғат Ешенұлына бұйырды.

«Астана ақшамы» газетінің бір жылдық тегін жазылымы турнирде үздік ойын көрсеткені үшін Несіп Жүнісбайұлына, «Вечерняя Астана» газетінің бір жылдық тегін жазылымы Аяған Сандыбайұлына табысталды. Сонымен қатар номинанттар Қазақстан мәслихаттарына 30 жыл медалімен марапатталды.



– Республика күнінің осындай дәрежеде тойлануы шын мәнінде біздің егемендікке деген құрметімізді білдірсе керек. Осы мерекеге орай «Elorda Aqparat» медиахолдингінің журналистер мен қаламгерлер арасында өткізген турнирде жеңімпаз атанып жатырмын. Шын мәнінде осындай жарыстарды ұйымдастырып туру қаламгерлерді, ардагерлер мен жастарды жақындастырады. Өйткені мұнда жеңу мен жеңілу мәселесі емес, керісінше ұрпақ сабақтастығының көрінісі алға шығады, – деді Дәулеткерей Кәпұлы.

– Бұл турнирді осыдан 3 жыл бұрын «Астана ақшамы», «Вечерняя Астана» газеттері шыға бастағанына 30 жыл толуына орай ұйымдастырған болатынбыз. Қаламгерлер, журналистер бұл турнирге айрықша ықылас танытты. Өйткені бұл жарыс қаламгерлердің, журналистердің өзара

пікір алмасатын, сырласып, әңгімелесетін тамаша алаңға айналды. Сосын да биыл 3-кезек өткізіліп отыр. Биылғы жарыстың Республика күніне және Астана қаласы мәслихатының 30 жылдығына орай өткізілуі бұл турнирдің тұғырын тіпті биіктете түсті. Осы орайда бізге қуатты қолдау көрсеткен қалалық мәслихатқа және барлық қатысушыларға айрықша алғыс айтамын, – деді жарыс соңында «Elorda Aqparat» медиахолдингінің директоры Олжас Сыдықбек.

...Отбасы, отанымыз аман болсын,

Қиындық халық көрген тамам болсын.

Ұрпақ үшін кәдімгі қой үстіне, Бозторғай жұмыртқалар заман болсын, – деп абыз ақсақал Қойшығара Салғараұлы бата берген бұл мағыналы басқосуға, берекелі жарысқа барлық қатысушылар дән риза боп тарасты.



АБАЙЛЫҚ БАЛУАННЫҢ БАҒЫ ЖАНДЫ

Астана қаласында Республика күніне орай, «Барыс-Арена» стадионында қазақ күресінен «Қазақстан барысы – 2024» республикалық турнирі өтті.

Шапағат
ӘБДІР

Жалпы 42 балуан бақ сынаған турнирге облыстық жарыстардың қорытындысы бойынша іріктелген еліміздің ең мықты балуандары қатысты. Олар – еліміздің 17 облысы мен республикалық маңызы бар 3 қала Астана, Алматы

және Шымкент қалаларының спортшылары.

Нәтижесінде жартылай финалда Шымкент қаласының балуаны Ерсултан Мұзаппаров әскер барысы Әділ Оразбаевтан айласын асырып, финалға шықса, екінші жұпта жартылай финалда Абай облысының қос балуаны Саят Шамшиев пен Ерасыл Қажыбаев сыңа түсіп, нәтижесінде Қажыбаев қарсыла-

сын таза ұтып, финалға шықты. Осылайша Ерсултан Мұзаппаров пен Ерасыл Қажыбаев финалда «Қазақстан барысы-2024» атағын сарапқа салып, қарсыласын шақ келтірмеген Ерасыл Қажыбаев чемпион атанды.

Ал қазақ күресінен XIII республикалық «Қазақстан барысы» турнирінің 3-орын үшін белдесуде Саят Шамшиев пен Әділ Оразбаев шеберлік байқасты.

Нәтижесінде Абай облысының балуаны Саят Шамшиев басым түсіп, «Қазақстан барысы – 2024» турнирінің 3-орын иегері атанды.

Жалпы жүлде қоры 27 100 000 теңгені құрайтын «Қазақстан барысы – 2024» республикалық турнирінің жеңімпазына 15 000 000 теңге берілсе, 2-орын алған спортшы 3 300 000 теңгеге иелік етсе, 3-орынға қол жеткізген балуан 1 080 000 теңге көлемінде сыйақы алды. Сонымен қатар әр балуан әр белдесуде жеңіске жеткені үшін тағы 100 000 теңгеден алып отырады.

Сондай-ақ турнирде жеңіске жеткен балуандардың бапкерлері де сыйақысыз қалмайды. 3 720 000 теңге спортшылардың жаттықтырушыларына берілді.



Газет ҚР Ақпарат және коммуникациялар министрлігінің Ақпарат комитетінде 23.05.2018 ж. тіркеліп, №17120-Г куәлігі берілген. Меншік иесі: «Elorda Aqparat» ЖШС

Директор – Олжас СЫДЫҚБЕК

Бас редактор – Еркін ҚЫДЫР

Бас редактордың орынбасары – Ғалым ҚОЖАБЕКОВ

Газетте жарияланған материалдарды сілтемесіз көшіріп басуға болмайды.

Газет сейсенбі, бейсенбі және сенбі күндері шығады.

Жарнама мен хабарландырулардың мазмұнына жарнама беруші жауап береді.

Газет «ASTANA AQSHAMY» газеті редакциясының компьютерлік орталығында теріліп, қатталды. Тираж – 5100. Апталық таралымы – 15 300

Тапсырыс №129

Баспахана: Астана қаласы, Сілеті көшесі, 30-үй «Медиа-холдинг «ERNUR» ЖШС

Редакция мекенжайы: 010000, Астана қаласы, Достық көшесі, 13, «Нурсая-2» ТК

Қабылдау бөлмесі: тел./факс: +7 (7172) 42-43-81 Тілшілер бөлімі: 42-41-03 Жарнама: 42-43-52 Va-reklama@mail.ru

aqsham1990@mail.ru

Кезекші редактор – Гүлмира АЙМАҒАНБЕТ